

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 32 (1946)

Nachruf: Scol. sec. Sep Mudest Nay (1892-1945)
Autor: Wieland, A.

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 15.03.2025

ETH-Bibliothek Zürich, E-Periodica, <https://www.e-periodica.ch>

† Scol. sec. Sep Mudest Nay

(1892 — 1945)

La mort prematura ded in carezau e zun meriteivel member de famiglia che ha luvrau e barhau sia entira veta per ses cars e quei senza risguard sin siu beinstar material fa mal als de casa ed oblighescha els per adina ad engrazieivladad e pietad visavi il permiert. Ils 31 de fenadur ha la famiglia romontscha cumpignau in de ses prominents e pli meriteivels tgaus-casa: nies poet e sribent romontsch, scolast secundar Sep Mudest Nay el senteri de siu carezau vitg natal Danis-Tavanasa.

Tgi de nus Romontschs enconuscheva buca nies Sep Mudest Nay? Tuts affons de scola, gia dall'emprema classa ensi han siu num sillas levzas e sia viarva romontscha el cor. Contas gadas ein els selegrai de sias originalas detgas e storgias. Contas gadas han els legiu e raquintau sia prosa romontscha che rocla baul sco in furibund e spimont ual tras alps e pastiras, che resplenda beinduras sco l'aua sereina dil lag alpin e che scaulda savens sco in sulegl permavaun che dedesta nova jarva e flurs sin pradas e pastgets. Contas gadas han ils affons declamau cun vusch sonora e cor ardent sias bellezia poesias e remas che contan plein amur e fervur della loscha mumma romontscha e dell'amada mumma materna. Buca meins enconuschents ei nies Sep Mudest a nus Romontschs carschi. Giuvens e giuvnas, purs e mistergners, luvrers ed intellectuals ha el savens instruiu e delectau cun plaids e referats en scret ed a bucca. Sia plema fuva sublima, originala e precisa, beinsavens era recenta e sarcastica, mo aunc pli interessant fuv' ei ded udir el a plidond e veser el gesticular leutier. Nay dominava il lungatg romontsch e tudestg a bucca ed en scret sco paucs romontschs e fuva in excellent e versau oratur d'ina extraordinaria eloquenza.

Sep Mudest Nay ei naschius ils 11 d'october 1892 a Danis. Siu bab, in capavel mistergner, ha el piars ch'el fuva aunc giuvens. Sia mumma ei morta per avon dus onns. Mumma e fegl ein adina stai in vicendeivel sustegn ella veta. In tragic malart dil destin ha accumpignau el sin siu entir viadi tras la veta terrestre. Sia premurada consorta ei morta en giuvens onns e mo quels che fuvan ses pli datier san tgei petras uras el ha stuii far atras cun sia sanadad pli u meins adina sguardinada. En

tut quellas uras ei sia mumma stada siu sustegn e sia consolaziun. Da sia carezia per la mumma dattan tontas bialas poesias en sia honor la megliera perdetga. Suenter ch' il svegliau giuven ha giu frequentau la scola primara a Danis e la scola reala a Trun eis ei stau il giavisch dil bab ch' el daventi scolast. Gia alla scola cantonala a Cuera han ins empriu d' enconuscher siu special dun per lungatgs. Igl onn 1913 eis el scolast della scola inferiura a Zignau. L' uiara mundiala de 1914—18 cun siu stendiu survetsch militar ha sco tier aunc biars auters sclavinau ses plans pil futur ed impediù Sep Mudest de frequentar la scola aulta che fuss stau siu ideal e giavisch els giuvens onns. Da sias reminiscenzas ed experienzas duront ils 4 onns de scola a Zignau raquintava el adina cun fiug ed entusiassem. L' attaschadad che affons e geniturs han demussau gia leu ad el ei perdetga de sias habilitads sco educatur e mussader ed ha segir dau ad el gl' impuls de sacrificar sia entira veta alla cara giuventetgna. Suenter 3 onns de scola en siu vitg natal vegn el clamaus a Tujetsch alla scola secundara, nua ch' el ha operau bunamein in quart tschentaner cul meglier success. Igl ei iu vess ad el de stuer bandunar la stiva de scola e cun quella sia carezada Val Tujetsch.

Sep Mudest Nay ha buca mo giu bien quitau per sia scola, na, el ha dedicau sia vasta savida e ses megliers duns en fatgs metodics e pedagogics all' entira scola romontscha sursilvana. Sco poet e scribent fuv' el predestinaus de sorprendere la redacziun de nos cudischs de scola. Sche nus possedein oz per nossas scolas romontschas sursilvanas exemplarics cudischs de scola, sch' ei quei en emprema lingia siu grond meret. El ha fatg sia lavur cun carezia e capientscha e sias ovras monumentalas vegnan aunc a survir per decennis all' instrucziun de nos affons. Ina tut speciala menziun mereta sia grammatica tudestg-romontscha che survescha als nativs tudestgs per emprender romontsch. En quell' ovra ha Nay capiu de schar reviver usits ed izonzas en nossas relaziuns purilas muntagnardas. Quel che studegia il romontsch empren aschia era d' enconuscher el medem temps nies sentir e patertgar, ensumma ina part de nossa cultura romontscha.

Duront 31 onn de scola ei Nay era staus in cussegliader e pionier per ses collegas giuvens e vegls. Tgi less numnar tut ses referats en conferenzas scolasticas, uniuns e societads. Cun sia perschasiun, sia eloquenza e siu temperament ha el svegliau tier pign e grond carezia per nossa tradiziun romontscha e pils beins culturals de nies pievel. La motivaziun de sia enconuschenta moziun «Renconuschientscha dil Romontsch sco lun-

gatg nazional» ei stada in plaid meisteril. Il bi success de quella lavur ei staus per Nay forse la pli gronda satisfacziun ch'el ha giu per tut siu nunstunclenteivel operar en favur de siu carezau lungatg matern. Segiramein ha Sep Mudest meritau il bi verset ch' il poet ha dedicau da cuort a sia pia memoria:

Car poet en pintga val
Has al Romontsch fatg grond vial.
Has mess a Cuer' il document
Dal suveran Tiu monument.
Il vierv matern has carezau
E Tia patria honorau.

Che Nay haveva era in egl aviert e buna capientscha pil beinstar material de nies pievel ha el documentau repetidamein cun plaids e cun ovras. Sco fegl ded in capavel mistergner ha el adina saviu apprezzar la valeta ded in beinempriu mistregn per la giuventetgna e per la famiglia. Sez senza figlialonga eis el sentius ton pli obligaus de segidar culs babs de famiglia per facilitar a bia giuvens e giuvnas igl emprender in mistregn. La flurenta scola professionala della Cadi che dumbra oz varga 70 emprendists ed emprendistas ei stau en emprema lingia sia ovra. Per ella ha el giu bien quitau entochen sia mort.

Sep Mudest Nay ha luvrau entochen sia davosa ura pil beinstar de nossas scolas romontschas, per la prosperitad de nosa giuventetgna e per la promovaziun e pil manteniment de nos beins culturala. Malsauns en letg a Locarno, nua ch' el fuvu serendius per encurir megliurament ni silmeins levgiament de sia maligna malsogna, ha el scret la biala cumedia festiva per la fiasta centenara de Giachen Hasper Muoth.

La biala fiasta a Breil ha Nay buca pudiu survivor. Ses gronds merets pil pievel romontsch vivan denton vinavon. En 100 onns vegnan ils Romontschs a festivar a Breil la dubla fiasta centenara en memoria e honor de **du**s meriteivels campiuns pil svilup e manteniment de nosa cara mumma romontscha:

Giachen Hasper Muoth — Sep Mudest Nay

A. Wieland, scol. sec.